

國方志叢書・華中地方・第七三九號

據

清・馮蘭森等修、陳卿雲等纂
清同治九年刊本

影印

江 西 省

上高縣志

(三)

成文出版社有限公司印行

重修上高縣志卷八

知縣事歸安馮蘭森纂輯

人物志

宦績
義行

儒林
技術

文苑
寓賢

忠節

孝友

處士

嶽峻崧高實產名世傑固惟人靈亦以地錫右川原古

稱秀麗宜有英髦篤鍾間氣家寶國華文章節義處則

醕儒出則循吏紀績旂常誓功帶礪俯仰遺編前徽可

繼作人物志

宦績

唐

二萬縣志

卷八

人物

宦績

一

鍾傳上高末山人以負販自業時王仙芝猖狂江南大亂眾推傳爲長乃鳩夷獠依山爲壁至萬人自稱高安鎮撫使仙芝遣柳彥璋畧撫州不能守傳人據之言諸朝詔卽拜刺史中和二年逐江西觀察使高茂卿遂有洪州撫民危全諷聞傳之去竊州以叛使弟仔昌據信州僖宗擢傳江西團練使俄拜鎮南節度使檢校太保中書令爵潁川郡王又徙南平傳率兵圍撫州天火其城士民譴驚諸將請急攻之傳曰乘人之險不可乃祝曰全諷罪無害民者火卽止全諷聞謝罪聽命以女女傳子匡時傳以匡時爲袁

州刺史擊馬殷又以彭玕爲吉州刺史玕健將也傳倚以爲重廣明後州縣不鄉貢惟傳歲薦士行鄉飲酒禮率官屬臨觀資以裝齎故士不遠千里走傳府傳少射獵醉遇虎與鬪虎搏其肩而傳亦持虎不置會人至斬虎然後免旣貴悔之戒諸子曰士處世尙智謀勿效吾暴虎也乃畫搏虎狀以示子孫天祐三年卒匡時自立爲節度觀察留後次子匡範爲江州刺史

新唐書本傳

鍾傳白土下團九峯人元志亦曰上高崇福寺卽鍾傳舊宅考五代史通鑑皆以爲高安人蓋是時上高未置

尚屬高安耳而袁州志以爲萬載人則誤也

府志餘

按傳生於白土九峯在今上高境內宋運副蔣之奇九峯寺詩所謂沿澗扳崖入翠霞寺僧猶記舊鍾家是也唐書五代史通鑑俱載傳爲高安人以上高故名望蔡唐武德八年併望蔡入高安至南唐保大十年始復析置上高縣當傳時尙統屬高安故史氏仍蒙唐代載籍之舊文至宜春龍江志稱鍾傳宅在袁州西北化成巖側唐僖宗賜第有南北二池又有別業在萬載縣北十五里今爲民田有石峯人稱爲鍾令公石筍此則傳旣

貴顯是以賜第別業徃徃而在其微時生長里居固確
然在上高之九峯無疑也

蔡劍字鈍鉤上蔡人以平黃巢功拜左散騎常侍江南西道
節度副使子郊字貺夫授行營判官高駢忌之付以羸兵
歿於王事孫嵩岑俱仕宋至宋太平興國三年奉命鎮守
鹽步鎮遂獻議於朝以本鎮地廣勢險不足以便民戢奸
請易鎮爲縣朝議允之遂立新昌縣

按劍初家上蔡後始家鹽宋太平興國七年卽鹽步鎮
析置新昌縣故新昌志亦載今仍舊志存之以劍故爲

上蔡人從其朔也

唐書五代史皆無蔡劍惟氏族大全有之新昌志謂鍾傳求婚於劍劍曰我世爲唐忠臣豈以女事賊乎此言未必然考通鑑綱目書傳無貶詞蓋大亂之世朝政不綱非割據無以保鄉族觀傳圍撫州而不忍迫人於危其本心亦明矣矧素服事唐固非馬殷楊行密之比劍亦賢者也肯以傳爲賊耶

府志餘

宋

羅肱字茂勤新城曲禮人自少豪邁不羣年甫十八金兵軼

境肱集鄉兵保安數郡時大將岳飛韓世忠深倚信之而
劉琦亦屢咨奇謀順昌之捷厥功居多特奏授秉義郎江
西兵馬都鈐轄後憤飛死棄官屢召不仕

舊志

羅之紀字國張新城曲禮人肱三世孫自幼穎悟淹貫經史
嘗從朱晦庵張南軒遊楊誠齋調其詩有騷體雷衛公謂
其詩類東坡詞類淮海涪熙癸卯己酉兩領鄉薦開禧乙
丑任本學教諭嘉定辛未奏名第一授迪功郎孝感尉時
正言龔蓋卿持節湖北以之紀持身廉謹蒞事精審薦諸
朝攝雲蒙縣上官少不爲禮因雪壓竹賦詩云吾道非邪

真可恥此君豈是折腰人又云心孔不容欺字入耳根寧
縱巧言干又云行行莫念家山遠明月滿船春水肥遂去
官歸再調文林郎宜山縣丞未赴而卒號筠心居士著有
易傳文集行世

舊志

明

況和卿河北岸人洪武間以人才應辟任寧波府同知爲政
嚴厲坐誣訴赴京廷訊不屈至抉目以示太祖驚異命醫
之并賜絹以旌其直

康熙劉志

況文字應奎河東人永樂甲申進士擢監察御史巡按浙江

至湖州夜夢一人披髮從老翁來且泣且訴詰且有巨蛇
伏廳事乃召官吏詢之意必有冤者既而廉得歸安縣民
嘗毒殺人匿屍山間捕鞠伏辜人咸稱爲神明正統己巳
都御史以扈從北行文望重一朝遂推掌都察院事尋出
爲廣東左參政歷官每大書平恕二字以自儆故所在深
得民心

見明一統志

陳愚永樂十二年知長泰縣慈祥豈弟訟者以理解之使自
消釋葺壞補遺不勞民力歷官三年治教修行時謂得牧

民之體

見福建通志名宦

王綱字存紀河東田北人永樂進士初會試登乙榜例授教職與蕭時中等十八人奏考試不公文皇復親策稱旨並賜冠帶令祭酒司業親教之後辛卯科登上第任河南等道監察御史巡按福建廣西河南執法不撓所至有聲擢山西左叅政正統間以山西右布政使致仕歷仕四朝始終翼翼歸休於家不謁當事惟行鄉飲酒禮棹一小舟往來氣節凜然有古大臣風所著有薇垣清興集卒祀鄉賢

祠 見明一統志

李敬忠河北岸人永樂間歲貢長於占驗由上元縣主簿游

陞廣東四會知縣發奸摘伏人稱神明

見廣東通志名宦

按廣東通志敬忠誤作敬中歲貢誤作吏員

道光林志跋

羅九遜字順泰號恬翁崇本團洋田人任工部營繕所丞潔已愛民事上官不以諛悅爲恭宣德八年修理南京宮殿九遜粗衣淡食訓飭匠工一切營造銷筭雖極嚴寒盛暑不少休先是工部有興作戶不問幾丁悉徵赴京役於公者十不一二餘皆爲所管人私役九遜廉得其實力請革其弊正統二年加營繕所正銜尋以母老告養歸里建有勅書樓迎恩橋以誌感

嘉慶劉志補

黃景字文昭修仁團人成化己丑進士歷禮部主事郎中奏對稱旨陞左通政尋遷禮部左侍郎宏治初以時議不合致仕正德間忤逆瑾謫戍燉煌瑾誅乃得赦歸卒景嘗奉詔保定河間賑荒計慮周悉全活甚眾又嘗勸憲宗以養心之學及建議裁抑西僧之爲民害者持論侃侃綽有足

觀云

省志

晏鑣字雅聖全安下壩頭人天順壬午舉於鄉謁選得湖廣寧鄉縣知縣人以長材短馭惜之鑣曰是豈不足報國恩拊風抱耶單車抵任因其俗爲設禁教養民愛士有龔黃

遺規邑大瀉飛鳳諸山素稱賊藪鑣撫勦並用羣盜解散
吏民安堵尋丁內艱人賁百錢以送號泣而去服闋補四
川大足縣仁愛廉明視前有加以赴召入都卒於途嘉靖
間祀鄉賢及寧鄉名宦祠

按鑣既祀鄉賢不應缺傳今采家傳以補劉志之闕

道光

林志
跋

吳鏜字廷器河北岸人歲貢生博學強記成化時授泉州府
推官性喜淡薄節嗜慾嚴取與嘗自勵曰居官不清白何
顏覩士大夫後解組歸行李蕭然了無不豫之色林居二

十年家計屢空晏如也士論高之卒祀鄉賢

見省志○按省志錄作堂

監生

簡芳字德馨修仁團人自幼穎敏宏治丙辰進士初任南京

刑部主事歷員外陞兵部武選司郎中性耿介執法明允

權勢無所假借卒於官祀鄉賢祠

省志

李文字顯道由舉人知乳源縣介潔自持興學校崇禮教政

化大行比卒士民流涕

省志

聶珙字周贊豸上人正德辛未進士觀政刑部平反不阿權

勢雖被降謫操行彌堅尋擢福建按察司僉事會倭寇興

泉躬冒矢石民賴保安以山東兵備副使致仕親睦隣族
不吝施予常抑然自下人不知爲顯宦也卒祀鄉賢

見省志

黃美號石龍河西灣溪人選貢生性剛介嘗讀書白鹿洞歷
知嘉興秀水縣所在稱治故事坐堂日供黃絹一匹美曰
民脂膏也去之有吳生鵬才而貧美厚遇之及美致政歸
不十年而鵬開府江西會有令營薦者知美最善鵬持數
千金以請美愕然曰求薦豈好官耶麾去不顧江南巡撫
慕其高節具金綺聘之不赴乃寄以詩有不羨金龜好偏
乘白鹿遊之句卒祀鄉賢

省志

李偕號少宰河北岸人嘉靖庚子舉人授大田知縣方下車
逋盜爲亂嚴治塹堡以威鎮之歷任三載俸資外分毫無
取陞太僕寺丞去日民携金帛爲贈和顏慰辭之尋授兵
部主事調工部督建永定七門重城累功賜金出爲廣東
兵備道克平寇攘具疏定二源奉旨以邊才超擢議陞閩
府尋卒建有章賜堂資勅樓留餘書院著有李氏家藏二
十四集併諸疏稿

見省志

吳學詩字伯興號虛宇河北岸人少穎敏篤學經史過目成
誦督學王宗沐巡撫何澐奇其文稱爲大家登嘉靖乙丑